



REPUBLIKA E SHQIPËRISË
KOMISIONI QENDROR I ZGJEDHJEVE
KOMISIONERI SHTETËROR I ZGJEDHJEVE

Data: 7.11.2024

Nr: 194

Ora: 16:30

VENDIM

PËR

**RREGULLAT TEKNIKE TË ADMINISTRIMIT, NËPËRMJET “PER”-IT, TË
KËRKESAVE PËR REGJISTRIMIN E ZGJEDHËSVE NGA JASHTË TERRITORIT TË
REPUBLIKËS SË SHQIPËRISË**

Në mbështetje të nenit 19, pikat 1, shkronja “n”, dhe 2, nenit 24 dhe nenit 25, të ligjit nr. 10019, datë 29.12.2008, “Kodi Zgjedhor i Republikës së Shqipërisë”, të ndryshuar,

VËREJ:

I. Rregulla të përgjithshme

- Zgjedhësi që dëshiron të votojë nga jashtë vendi, paraqet një kërkesë individuale për regjistrim në listën e zgjedhësve që votojnë nga jashtë vendit, nëpërmjet Platformës Elektronike të Regjistrimit, nga këtu e vijim në këtë vendim referuar si “PER”, e cila krijohet, mirëmbahet dhe përditësohet nga Komisioni Qendror i Zgjedhjeve për këtë qëllim.
- Rregullat për regjistrimin e zgjedhësve nga jashtë vendit janë ato të përcaktuara në aktin përkatës të Komisionit Rregullator.

II. 1. Rregulla të posaçme procedurale-teknike të “PER”

- “PER” duhet të krijohet dhe të funksionojë në përputhje me kuadrin rregullator në fuqi, që lidhet me ruajtjen e të dhënave personale të zgjedhësve.
- “PER” do të ketë dy komponentë kryesorë:
 - Modulin e regjistrimit**, përmes të cilit zgjedhësi bën kërkesën për regjistrim dhe verifikon identitetin;

Data: 7.11.2024 Nr: 194
Ora: 16:30



“Për rregullat teknike të administrimit, nëpërmjet “PER”-it, të kërkesave për regjistrimin e zgjedhësve nga jashtë territorit të Republikës së Shqipërisë”

- b. **Modulin e shqyrtimit të kërkesave**, përmes të cilit KQZ shqyrton dhe verifikon informacionin e paraqitur nga zgjedhësit.
3. Këto module do të plotësojnë kriteret ndërkombëtare të praktikave më të mira të zhvillimit (*ang. 'Good Development Practices'*).
4. Këto module do të mundësojnë një proces të sigurtë dhe të besueshëm për menaxhimin e kërkesave për regjistrim.

II.2. Rregullat për funksionimin e “PER”

“PER” duhet të plotësojë minimalisht kërkesat si më poshtë vijon:

- a. Mbledhje të të dhënave të gjenealiteve biometrike dhe dokumenteve fizike të skanuara, që zgjedhësi plotëson dhe/ose ngarkon në “PER”.
- b. Të jetë në gjendje të kapë një foto “selfie” të zgjedhësit, për ta ruajtur në sistemin qendror të menaxhimit të identitetit. Për të siguruar cilësinë e “selfie-t”, aplikacioni në internet dhe aplikacioni i portofolit digjital duhet të lehtësojnë dhe optimizojnë procesin e kapjes së fotos.
- c. Të ketë mekanizëm të kontrollit të aksesit biometrik (njohje e fytyrës).
- ç. Të kryejë kontrollin e verifikimit të pranisë së gjalli të personit (*ang. user liveness check*) dhe të krahasojë fotografinë e marrë me fotografinë e profilit të siguruar nga një ID fizike e vërtetuar.
- d. Të lexojë automatikisht të dhënat identifikuese nga dokumenti i identifikimit të zgjedhësit.
- dh. Të përfshijë një motor njohje që ndihmon zgjedhësin të pozicionojë saktë dokumentin e identifikimit brenda një kornize, të rregullojë imazhin për të siguruar këndin dhe cilësinë e kërkuar, dhe të kapë automatikisht imazhin e dokumentit.
- e. Nxjerrja e informacionit nga dokumentet fizike të identifikimit duhet të bëhet përmes Njohjes Optike të Karaktereve (*ang. OCR*).
- ë. Sistemi duhet të kërkojë adresën e e-mailit të zgjedhësit ose numrin celular dhe të përdorë një fjalëkalim një përdorimsh, për të konfirmuar informacionin e kontaktit të dhënë nga zgjedhësi;
- f. Sistemi duhet të kërkojë adresën e plotë të zgjedhësit jashtë vendit, sipas fushave të paracaktuara në aktin përkatës të Komisionit Rregullator.
- g. Sistemi duhet të lejojë ngarkimin e një dokumenti si provë të adresës. Verifikimi i adresës do të bëhet nga operatori/nëpunësi i KQZ nga Moduli i Shqyrtimit të Kërkesave.
- gj. Mekanizëm për bllokimin e aksesit, nëse bëhen disa përpjekje të pasuksesshme për hyrje.
- g. Mekanizëm për zhblokimin e aksesit, në rastet e bllokimit.
- h. “PER” duhet të lejojë operatorët/stafin e KQZ-së, të shqyrtojnë aplikimet e marra dhe të pranojnë, refuzojnë, ose të kërkojnë më shumë informacion.
- i. Kur një aplikim refuzohet, operatori/stafi i KQZ-së duhet të japë një nga arsyet e përcaktuara në ligj për refuzimin dhe vendimi i komunikohet kërkuarit.
- j. Kur një operator/stafi i KQZ-së zgjedh të kërkojë më shumë informacion, duhet të specifikojë qartësisht në mesazh se cili është informacioni shtesë që duhet të sigurohet nga aplikuesi.
- k. Zgjedhësi duhet të njoftohet për ndryshimet e statusit të aplikimit të tij.

- l. Njoftimet do të dërgohen në adresën e email-it dhe/ose numrin celular të regjistruar nga zgjedhësi gjatë procesit të aplikimit, si dhe “PER”.
- ll. Kur një kërkesë për regjistrim është shqyrtuar dhe miratuar, “PER” do të dërgojë një njoftim që informon zgjedhësin për regjistrimin e suksesshëm.
- m. Kur një kërkesë është shqyrtuar dhe refuzuar, sistemi do të dërgojë një njoftim duke informuar zgjedhësin për refuzimin dhe duke ofruar arsye/et e refuzimit.
- n. “PER” duhet të jetë i pajisur me një modul të veçantë kontrolli për historikun e veprimeve të administrimit dhe nivele të ndryshme sigurie të aksesit në të dhëna, që siguron gjurmimin dhe identifikimin e çdo veprimi të stafit që administron sistemin. Kjo minimalizon riskun e ndërhyrjeve të papritura dhe gabimeve njerëzore.
- o. Për të aksesuar Modulën e Shqyrtimit të Kërkesave, zgjidhja duhet të lejojë autentifikimin me 2 (dy) faktorë përmes hyrjes me emër përdoruesi-fjalëkalim dhe kodit unik të përkohshëm 6 shifror, që dërgohet nga operatori/stafi i KQZ-së në numrin e tij të telefonit dhe/ose email;
- p. Moduli i Shqyrtimit të Kërkesave duhet të mbyllë sesionin e përdoruesit, nëse nuk ka aktivitet për një periudhë të paracaktuar kohe;

II.3. Rregullat teknike për shqyrtimin e kërkesave për regjistrim nga “PER”

Shqyrtimi i kërkesave dhe regjistrimi i zgjedhësve nga jashtë vendit në “PER” kryhet përmes:

- a. Verifikimit automatik në kohë reale me Regjistrin Kombëtar të Gjendjes Civile (RKGjC), i cili kontrollon saktësinë dhe përputhshmërinë e të dhënave identifikuese të zgjedhësit.
- b. “PER” verifikon automatikisht përputhshmërinë e të dhënave biometrike të identifikimit të zgjedhësit nga jashtë vendit, që paraqet kërkesën për regjistrim në “PER” me foton e skanuar nga dokumenti i identifikimit që ai ngarkon në “PER”.
- c. “PER” verifikon dokumentacionin, i cili vërteton adresën e banimit jashtë territorit të Republikës së Shqipërisë.
- ç. Verifikimit manual nga stafi i autorizuar nga KQZ-së në Modulën e Shqyrtimit të Kërkesave, nëse dokumentacioni i cili vërteton adresën e banimit jashtë territorit të Republikës së Shqipërisë është në përputhje me kërkesat e parashikuara në aktin përkatës të Komisionit Rregullator.

II.4. Rregullat për mirëmbajtjen, mbikëqyrjen dhe auditimin e “PER”

1. Komisioni Qendror i Zgjedhjeve duhet të parashikojë dhe të hartojë marrëveshjen kontraktuale mbi nivelin e shërbimit (ang. *Service Level Agreement - SLA*).
Kjo marrëveshje nënshkruhet ndërmjet Komisionit Qendror të Zgjedhjeve dhe ofruesit të shërbimit të TIK me objekt mirëmbajtjen e “PER”.
Kohëzgjatja e kësaj marrëveshjeje duhet të jetë jo më e shkurtër se 2 (dy) vjet në zbatim të legjislacionit në fuqi.
2. Partitë politike, organizatat joqeveritare shqiptare dhe të huaja, si dhe organizatat ndërkombëtare të specializuara ose të angazhuara në mirëqeverisjen dhe demokratizimin, përfaqësuesit e shteteve të

huaja të akredituar në Shqipëri, si dhe të medias, të cilat kanë të drejtë të njihen me të gjitha elementët dhe karakteristikat teknike të “PER”, veçanërisht gjatë proceseve të testimit paraprak operacional, kontrollit apo auditimit të saj do të duhet të njoftohen në kohë nga Komisioni Qendror i Zgjedhjeve për të marrë pjesë në këto kqyrje si dhe do duhet t’u vendosen në dispozicion paraprakisht i gjithë dokumentacioni i nevojshëm.

3. Me kërkesë të partive politike, ose kryesisht, KQZ mundëson auditim të pavarur të “PER” nga subjekte të specializuara, në çdo fazë. Për të mundësuar këtë, Komisioni Qendror i Zgjedhjeve merr masa të parashikojë në buxhetin e institucionit fondin përkatës për këtë qëllim.

PËR KËTO ARSYE:

Bazuar në nenin 19, pikat 1, shkronja “n”, dhe 2, nenin 24 dhe nenin 25, të ligjit nr. 10019, datë 29.12.2008, “Kodi Zgjedhor i Republikës së Shqipërisë”, të ndryshuar,

V E N D O S:

1. Miratimin e rregullave teknike të administrimit, nëpërmjet “PER”-it, të kërkesave për regjistrimin e zgjedhësve nga jashtë territorit të Republikës së Shqipërisë”.
2. Ky vendim hyn në fuqi menjëherë dhe publikohet në faqen zyrtare të internetit të Komisionit Qendror të Zgjedhjeve.
3. Kundër këtij vendimi mund të bëhet ankim në Komisionin e Ankimimeve dhe Sanksioneve brenda 30 (tridhjetë) ditëve nga shpallja e tij.

Komisioneri Shtetëror i Zgjedhjeve

Ilirjan CELIBASHI